

Minister Mike de Meza:

Grupo multi disciplinario ta desaroyando un plan pa waf di Playa

ORANJESTAD – E desaroyo di e waf nobo na Barcadera a crea oportunidad pa converti e area di Oranjestad su waf den algo completamente nobo.

“Pa e area aki por wordo planifica y converti, un grupo multi disciplinario a wordo lanta cu representante di entre otro DIP, DOW, Freezone N.V. y APA,” asina Minister de Meza encarga cu asuntonan economico, como tambe companianan estatal, a splica.

Den luna di september e grupo di trabou encarga cu e desaroyo nobo di e waf di Oranjestad a presenta nan programa preliminar di rekisito pa e waf di Oranjestad na ministerio di Desaroyo Urbano, Infraestructura y Integracion. Cu tempo un programa mas detaya lo wordo traha caminda lo presenta e vision nobo pa e waf di Oranjestad y mas especificamente locual e area aki lo wordo converti aden. A bay di acuerdo cu DIP lo ta encarga cu e diseño di e plan preliminar aki.

“E destinacion y desaroyo di Oranjestad su waf ta un otro parti crucial pa e desaroyo di nos capital,” minister de Meza a indica. “E ta clave pa e balansa cu Gabinete Mike Eman II kier yega pa desaroyo economico, infraestructura y calidad di e desaroyo urbano, specialmente areanan publico. Asignando e area di e waf pa otro proposito lo resulta den un conexion directo cu centro di ciudad. E area di waf di Oranjestad ta uno bastante grandi. Esaki ta trece un sin fin di posibilidad pa desaroya e tereno aki cu lo wordo destina pa otro fin”, Minister de Meza a conclui. □